

■ FRACZIUN PCD

Revisiun da la lescha da taglia – na uschia

(cp) La regenza dal chantun Grischun ha deliberà dacurt il messadi davart la revisiun parziala da la lescha da taglia per mauns dal cussegl grond. Tant la pcd grischuna sco la fracziun cristian-democratica en il cussegl grond èn sorprendidas che la regenza na vul betg dar suatientscha a l'intervenziun dal cussegl grond pertutgant la valor da l'atgna fittanza e limitar l'importo da deducziun tar ils custs da viadi (per pendularis).

Suenter avair ditg gea tar la votaziun federala davart la finanziaziun ed extensiun da l'infrastructura viafierila vegn la deducziun per ils custs da viadi limitada a 3000 francs ad onn sin plaun federal. La confederaziun surlascha als chantuns dad era pudair introducir ina reducziun da questa deducziun. La regenza propona da limitar la deducziun per ils custs da viadi en il chantun Grischun sin 9000 francs. Gia en connex cun la votaziun davart la finanziaziun ed extensiun da la structura viafierila ha la pcd dal Grischun adina puspè rendì attent ch'ina limitaziun da la deducziun dals custs da viadi na vegnia betg en dumonda sin plaun chantunal. Gist en il chantun Grischun cun bleras regiuns periferas è la deducziun tar ils custs da viadi per la populaziun decentralisada decisiva e da muntada existenziala. Bliers lavurers abiteschan en regiuns e penduleschan di per di en ils centers.

Ina reducziun da la deducziun per ils custs da viadi avess grevas consequenzas per las regiuns ed accelerass la depopulaziun. Ins sto sa dumandar schebain la regenza veglia sientar ora cun sia proposta las regiuns. Quai na va dentant betg tar nus. La proposta da la regenza è ina attatga directa sin la urbanisaziun en il Grischun e cunterfa dal tut a las fadias da far attraktivs las regiuns per abitar. La pcd vegnia perquai a s'engaschar vehemementamain cunter far mendras las cundiziuns generalas da viver.

Surpraisa è tant la pcd grischuna sco era la fracziun cristiandemocratica da la posiziun da la regenza pertutgant la valor da l'atgna fittanza. Il cussegl grond aveva decidì en la sessiun dal zercladur 2014 da taxar la valor da l'atgna fittanza cun 60% da la valor stimada. Igl è perquai strusch da crair che la regenza n'è uss betg pronta da realisar l'incarica surdada.